

## **INSTRUKCIJA ZA IMPLEMENTACIJU PRIVREMENOG MODELA PRISTUPA „VIRTUELNE ELEKTRANE“ TRŽIŠTU ELEKTRIČNE ENERGIJE U BIH**

1) Balansno odgovorna strana (u daljem tekstu: BOS) dostavlja NOSBiH-u zahtjev za dodjelu EIC Z i W kodova za „Virtuelnu elektranu“ koja se nalazi u sastavu njegove balansne grupe (u daljem tekstu: BG). Uz zahtjev, BOS dostavlja popis elektrana koje čine njegovu „Virtuelnu elektranu“, sa sljedećim podacima za sve elektrane - pojedinačno:

1. instalisana snaga elektrane
2. tip elektrane
3. potvrda od nadležnog ODS-a da elektrane ispunjavaju tehničke uslove za prikupljanje potrebnih podataka u skladu sa uputstvima NOSBiH-a i odredbama Mrežnog kodeksa kao i drugih važećih propisa.

Ukoliko su elektrane u sastavu „Virtuelne elektrane“ BOS-a priključene na različite ODS-ove, potrebno je da BOS dostavi potvrde od svih ODS-ova na čiju su mrežu priključene.

2) Nakon dobijanja kodova iz tačke 1., ove Instrukcije, BOS je dužan inicirati i pokrenuti pregovore o ažuriranju važećeg ugovora o balansnoj odgovornosti te obezbijediti da BOS dostavi NOSBiH-u potrebne podatke i ažurirane tačke primopredaje električne energije.

3) Promjena sastava „Virtuelne elektrane“ vrši se na mjesečnom nivou. Ukoliko je bilo promjena u sastavu „Virtuelne elektrane“, BOS dostavlja NOSBiH-u ažuriran popis elektrana koje se nalaze u sastavu njegove „Virtuelne elektrane“ do 25. dana u mjesecu M-1 za mjesec M. Uz ažurirani popis, BOS dostavlja i sve druge potrebne podatke te dokumente po zahtjevu NOSBiH-a.

4) Za BOS koji u svom sastavu od proizvodnje ima „Virtuelnu elektranu“, čija je instalisana snaga veća od 30% ukupne instalisane snage portfolia BOS-a na prijenosnoj mreži iznos instrumenta finansijskog obezbjeđenja za debalans balansne grupe (bankarske garancije ili depozita) određuje se na sljedećim principima:

1. Finansijske vrijednosti planirane prosječne trodnevne potrošnje električne energije BOS-a, koja se računa po prosječnoj cijeni debalansa za manjak električne energije u godini koja prethodi godini za koju se izdaje instrument finansijskog obezbjeđenja.

2. Finansijske vrijednosti planirane prosječne trodnevne proizvodnje električne energije BOS-a na prijenosnoj mreži, koja se računa po prosječnoj cijeni debalansa za manjak električne energije u godini koja prethodi godini za koju se izdaje instrument finansijskog obezbjeđenja.

3. Finansijska vrijednost prosječne mjesečne proizvodnje (ekvivalentna zbirnoj/agregiranoj instalisanoj snazi "Virtuelne elektrane") električne energije BOS-a koja se računa po prosječnoj cijeni debalansa za manjak električne energije u godini koja prethodi godini za koju se izdaje instrument finansijskog obezbjeđenja.

Visina iznosa instrumenta finansijskog obezbjeđenja nije ograničen.

Ukoliko NOSBiH aktivira instrument finansijskog obezbjeđenja, BOS je novu bankarsku garanciju ili depozit dužan dostaviti, odnosno uplatiti, u roku od (7) dana nakon aktivacije, ukoliko je garancija, odnosno depozit, iskorišten u punom iznosu.

Ukoliko je instrument finansijskog obezbjeđenja iskorišten samo djelimično, banka treba izvršiti povrat originalne garancije sa naznakom iznosa protesta, odnosno, BOS je dužan da uplatiti iskorišteni iznos depozita u roku od sedam (7) dana nakon aktivacije.

4. Prije potpisivanja Ugovora o balansnoj odgovornosti BOS je, po zahtjevu NOSBiH-a, dužan dostaviti sve podatke i dokumente potrebne za utvrđivanje tehničkog/tržišnog i finansijskog rizika i boniteta BOS-a, u skladu sa pravilima struke. NOSBiH će nakon analize dostavljenih dokumenata, a na osnovu preporuke stručnih službi, donijeti odluku o eventualnim dodatnim instrumentima obezbjeđenja ugovornog odnosa (stvarni, personalni i sl.), a sve u skladu sa utvrđenim finansijskim rizikom i analiziranim bonitetom BOS-a.

5) BOS u svom dnevnom rasporedu prijavljuje proizvodnju "Virtuelne elektrane" kao zbirnu/agregiranu vrijednost svih elektrana priključenih na distributivnu mrežu koje pripadaju njegovoj BG, u skladu sa dokumentom *Uputstva za dostavljanje dnevnih rasporeda* koji je objavljen na web stranici NOSBiH-a.

6) Obračun debalansa BOS-a vrši se u skladu sa važećim procedurama, pri čemu nadležni ODS dostavlja za BOS agregiranu ostvarenu proizvodnju „Virtuelne elektrane“ na 15-minutnom nivou. Ukoliko ODS ne dostavi NOSBiH-u potrebne podatke za obračun debalansa BOS-a do 6. dana u tekućem mjesecu za prethodni mjesec, NOSBiH će izvršiti obračun debalansa za BOS sa podacima sa kojima raspolaže.